

禮

記

通

解

禮記通解卷二十

郝敬習

表記第三十二

表記取篇中仁者天下之表命篇所言多仁者之事  
子言之歸乎君子隱而顯不矜而莊不厲而威不言而  
信子曰君子不失足於人不失色於人不失口於人是  
故君子貌足畏也色足憚也言足信也甫刑曰敬忌而  
罔有擇言在躬

歸乎嘆辭蓋夫子周流不遇而思歸也隱而顯所謂  
闇然日章也不失足不輕進也莊故不失足威故不

失色信故不失口甫刑周書篇名引以明君子能敬  
戒則身無可擇去之言謂所言皆善猶詩云不可選  
也忌戒也引以明言足信之意而貌與色可知矣  
子曰褻襲之不相因也欲民之母相漬也子曰祭極敬  
不繼之以樂朝極辨不繼之以倦

褻褻褻露體曰褻單衣曰褻重拚曰襲褻裘襲裘詳  
見王藻詩云褻褻暴虎又云載衣之褻郊特牲云鄉  
人褻皆言衣也執王帛亦有褻襲單藉曰褻重裘曰  
襲不相因如子游褻裘而弔主人小斂畢襲裘入凡  
袒踊畢襲衣袒割牲袒免拜賓畢袒執弓射畢皆襲

衣執王帛如聘禮上介不襲執圭屈繼授賓賓襲執圭又公側授宰王褻降擯者出請賓褻奉帛加璧享之類皆所謂褻襲不相因也又喪禮袒與襲不同位亦不相因之義鄭註未達祭與鬼神交不極敬不能合漠少繼以樂則解散矣朝廷之上禮法政事所出秋毫必辨然後名分正而幾務清少繼以倦則廢墜矣

子曰君子慎以辟禍篤以不諄恭以遠恥子曰君子莊敬日強安肆日偷君子不以一日使其躬儻暫焉如不終日子曰齊戒以事鬼神擇日月以見君恐民之不敬

也。子曰：狎侮死焉而不畏也。子曰：無辭不相接也，無禮不相見也。欲民之母相褻也。易曰：初筮告，再三瀆瀆則不告。

篤，誠也。揜，如大學云：揜其不善而著其善之揜，能篤則誠中形外，本無虛偽。何揜之有？孟子所謂篤實有光輝是也。侈肆則招侮，不矜不伐，恭以持已。易所謂謙尊而光也。故遠恥，身心收斂，則精神自奮發。故曰：莊敬日強，安肆反是，僂焉頽側之狀，不莊敬之容，如不終日，卽不以一日使其躬之意，所謂不俟終日也。擇日月，卜吉也。王藻云：將適公，所齋戒。周禮云：祭祀

前十日帥執事卜日遂戒則是見君亦齊戒祭祀亦擇日月互言以明事君事神敬同也狎侮則招禍有至于死者而人不知畏也古者交際必有辭無辭則無名相見必有禮無禮則無交將命之類謂之辭執贊之類謂之禮有辭而後接則接不苟成禮而後見則見不瀆引易蒙卦彖辭義不甚協解見周易

子言之仁者天下之表也義者天下之制也報者天下之利也子曰以德報德則民有所勸以怨報怨則民有所懲詩曰無言不讐無德不報大甲曰民非后無能醫以寧后非民無以辟四方子曰以德報怨則寬身之仁

也。以怨報德，則刑戮之民也。

仁以長人，故爲天下之表；義主裁割，故爲天下之制。仁者愛人，則人皆愛之；義者敬人，則人皆敬之。故曰：報者，天下之利，以德報德，仁之事也；以怨報怨，義之事也。無言不讐，義也；無德不報，仁也。民非后，無以相安；仁也。后非民，無以君四方；義也。以德報怨，則怨釋而身安，故曰：寬身之仁。以怨報德，則拂情逆理，故曰：刑戮之民。

按：以怨報怨，非聖人之言。論語云：以直報怨。

子曰：無欲而好仁者，無畏而惡不仁者，天下一人而已。

矣是故君子議道自己而置法以民子曰仁有三與仁同功而異情與仁同功其仁未可知也與仁同過然後其仁可知也仁者安仁知者利仁畏罪者強仁

無欲而好仁非有意于爲善自止于至善也無畏而惡不仁非有意于去惡自無惡可去也故曰天下一人中心安仁者常少故無欲無畏者上智以之自待勉強行仁者常多故賞勸罰懲置法所以爲民仁有三謂安仁利仁強仁同功異情如五霸之假與三王之仁其功相似其情則異也同過知仁如周公使管叔與不智同孔子稱昭公與黨惡同然其仁可知也



仁者安仁不論功過惟率吾仁耳知者利仁以有功  
行仁也畏罪者強仁以免過求仁也

仁者右也道者左也仁者人也道者義也厚於仁者薄  
於義親而不尊厚於義者薄於仁尊而不親道有至義  
有考至道以王義道以霸考道以爲無失

凡人舉動行持右先左後右任而左助之仁爲立人  
之本萬善長於仁故曰右道爲義所當由之路仁窮  
佐以義故曰左偏于仁而廢義則以親而遺尊偏于  
義而廢仁則以尊而忘親尊親不兩全故以仁義相  
爲左右也道有至謂仁也有義以輔仁也有考以稽

義也得仁者王所謂無欲無畏也得義者霸所謂利而有功也得考者無失所謂強仁免過也

按道者仁義自然之名非仁外別有道也厚仁而薄義非真仁也厚義而薄仁非真義也至仁無不尊至義無不親霸者焉知義焉知道非夫子之言也

子言之仁有數義有長短小大中心惜恤愛人之仁也率法而強之資仁者也詩云豐水有芑武王豈不仕詒厥孫謀以燕翼子武王烝哉數世之仁也國風曰我今不閱皇恤我後終身之仁也

仁有數以義有長短大小隨宜用愛也如可以速則

速可以久則久禮以大爲貴以小爲貴之類中心慘  
怛安仁者也率循法度而勉強行之資利乎仁者也  
引詩言武王用賢遺孫以安輔其子澤流數世中心  
慘怛之仁也國風言我今已不見容何暇憂我後日  
此僅終其身率法強資之仁也芑穀名仕官人也閑  
容也

子曰仁之爲器重其爲道遠舉者莫能勝也行者莫能  
致也取數多者仁也夫勉於仁者不亦難乎是故君子  
以義度人則難爲人以人望人則賢者可知已矣子曰  
中心安仁者天下一人而已矣大雅曰德輶如毛民鮮

克舉之我儀圖之惟仲山甫舉之愛莫助之小雅曰高山仰止景行行止子曰詩之好仁如此鄉道而行中道而廢忘身之老也不知年數之不足也俛焉日有孳孳斃而後已子曰仁之難成久矣人人失其所好故仁者之過易辭也子曰恭近禮儉近仁信近情敬讓以行此雖有過其不甚矣夫恭寡過情可信儉易容也以此失之者不亦鮮乎詩云溫溫恭人維德之基子曰仁之難成久矣唯君子能之是故君子不以其所能者病人不以人之所不能者愧人是故聖人之制行也不制以已使民有所勸勉愧恥以行其言禮以節之信以結之容

貌以文之衣服以移之朋友以極之欲民之有壹也小  
雅曰不愧于人是不畏于天是故君子服其服則文以君  
子之容有其容則文以君子之辭遂其辭則實以君子  
之德是故君子恥服其服而無其容恥有其容而無其  
辭恥有其辭而無其德恥有其德而無其行是故君子  
素絰則有哀色端冕則有敬色甲冑則有不可辱之色  
詩云維鵜梯在梁不濡其翼彼記之子不稱其服

仁者天地人物生生之理所謂元善也堯舜猶病故  
曰重莫勝遠莫致取數多所以難也以義度人謂盡  
義以求合則天下無全人以人望人謂不遠人以爲

道則賢者可見矣。德輶如毛，言仁爲人所本有，輶如毫毛，易舉也。輶，輕也。儀圖猶比擬。仲山甫，周賢臣。高山仰言，山高則可仰。景行，大路也。言路大則可行，皆喻仁也。止者，仰求及行求至，卽夫子云斃而後已也。中道而廢，謂行至中路力疲而志勇忘老忘年死而後已，僂僂首不顧貌。仁道雖大，皆人可欲之理，人自失之。苟欲仁，斯至矣。見好仁力不足者，故仁者欲無過不失所好而已。故曰：易辭辭猶免也。恭儉信三者，本敬讓以行，所以辭過之道也。謙恭則無妄舉，用情則人信之，節儉則不犯禮，而人容之，乃所以辭過也。

故曰失之者鮮。聖人制行謂聖人立教以制民行。不以已之能事責人。惟因民爲制。所謂天下之達道也。民皆勸勉于行。而以不顧言爲恥。又節之以禮。固之以信。教之脩容貌。飾衣服。交朋友。無非欲民行歸一而已。衣服以移。謂服法服。則言法言。行法行。故曰移。然必朋友樂羣。德立行成。乃稱其服。故曰極移始之。極終之也。遂猶發也。有其德而無其行。謂心得是理。行或違之。非真德也。衰經則有衰色。三者皆容。稱服之事。然必內有哀敬不辱之真心。而后有是色。以稱其服。鵜鵠一名淘河食魚食汗之鳥。彼記猶言彼。

其之子指小人在位者

子言之君子之所謂義者貴賤皆有事於天下天子親耕粢盛秬鬯以事上帝故諸侯勤以輔事於天子子曰下之事上也雖有庇民之大德不敢有君民之心仁之厚也是故君子恭儉以求役仁信讓以求役禮不自尚其事不自尊其身儉於位而寡於欲讓於賢卑已而尊人小心而畏義求以事君得之自是不得自是以聽天命詩云莫莫葛藟施于條枚凱弟君子求福不回其舜禹文王周公之謂與有君民之大德有事君之小心詩云惟此文王小心翼翼昭事上帝聿懷多福厥德不回



以受方國子曰先王謚以尊名節以壹惠恥名之浮於行也是故君子不自大其事不自尚其功以求處情過行弗率以求處厚彰人之善而美人之功以求下賢是故君子雖自卑而民敬尊之子曰后稷天下之爲烈也豈一手一足哉唯欲行之浮於名也故自謂使人

此一節皆言爲臣之道賤而任事謂之義君子所謂義貴賤皆有事也躬耕以事上帝是天子之事服勤以輔天子是諸侯之事自諸侯以下可知已是以人臣事上雖有庇民之德不敢有君民之心惟自盡其事而安于爲臣無所爲而爲厚于仁者也故恭儉以

求自盡于仁信讓以求自盡于禮役者安分自盡之意卽所謂有事也尚上同不敢自尊上也得之自是不得自是謂得君與不得君臣所由惟是而已自由也莫莫茂密貌藹藹屬施及也條枚樹枝也凱樂也弟易也回邪也藹藹生于地上附于木以比君子謙恭樂易獲福于天也人臣有爵者死尊敬其名據生平美行爲謚美不備舉惟節取其一惠不欲名之過于行也惠順也一惠猶言一善過行弗率謂生平過甚之行弗循求之以處于醇厚之道也功之美者莫如后稷后稷之功兆民未賴豈一種植之利而欲其

行之過于名但自謂爲便利于人而已便猶利也謂稼穡之利所謂節以一惠故但名其爲稷引以徵不尚其事之義

子言之君子之所謂仁者其難乎詩云凱弟君子民之父母凱以強教之弟以說安之樂而母荒有禮而親戚莊而安孝慈而敬使民有父之尊有母之親如此而居可以爲民父母矣非至德其孰能如此乎今父之親子也親賢而下無能母之親子也賢則親之無能則憐之母親而不尊父尊而不親水之於民也親而不尊火尊而不親土之於民也親而不尊天尊而不親命之於民

也親而不尊鬼尊而不親子曰夏道尊命事鬼神而遠之近人而忠焉先祿而後威先賞而後罰親而不尊其民之敝憊而愚喬而野朴而不文殷人尊神率民以事神先鬼而後禮先罰而後賞尊而不親其民之敝蕩而不靜勝而無恥周人尊禮尚施事鬼敬神而遠之近人而忠焉其賞罰用爵列親而不尊其民之敝利而巧文而不慙賊而蔽子曰夏道未瀆辭不求備不大望於民民未厭其親殷人未瀆禮而求備於民周人強民未瀆神而賞爵刑罰窮矣子曰虞夏之道寡怨於民殷周之道不勝其敝子曰虞夏之質殷周之文至矣虞夏之文

不勝其質殷周之質不勝其文子言之曰後世雖有作者虞帝弗可及也已矣君天下生無私死不厚其子子民如父母有憐怛之愛有忠利之教親而尊安而敬威而愛富而有禮惠而能散其君子尊仁畏義恥費輕實忠而不犯義而順文而靜寬而有辨甫刑曰德威惟威德明惟明非虞帝其孰能如此乎

此一節論爲君之道強教愛而勞也說安得其心也強教所以致其尊說安所以致其親說安而能強教使民樂而無荒孝慈而敬親不忘尊是爲父之尊也強教而又悅安使民有禮而親威莊而安尊不忘親

是爲母之親也。非至德孰能與于此。人道父主于嚴。尊而不親。母主于愛。親而不尊。下無能謂子無能。父卑賤之。水懦人玩。親而不尊。火烈人畏。尊而不親。土利人踐。親而不尊。天高難近。尊而不親。命自然無心。而人忘之。親而不尊。鬼神變化不測。人畏而敬之。尊而不親。三代之治。夏道近古。所尊在命。以天命渾然爲一定。以鬼神禍福爲適然。切近人情。崇尚忠實。先祿賞。後威罰。親愛有餘。尊嚴不足。比其敝也。民多蠢愚。驕野而質朴。此尊命近人。尚親之末流也。殷人承之。尊鬼神以救愿慙之偏。以鬼神禍福爲先。以人道

禮教爲後。先罰後賞。尊嚴有餘。親愛不足。比其敝也。民多搖蕩不定。飾詐求勝而無恥。此尊神後禮尚尊之末流也。周人承之。尊禮教。好敷施。敬神而遠近人而忠。反夏之舊。其賞罰無先後。惟論爵列。如爵有五等。刑有八議之類。亦親愛有餘。尊嚴不足。比其敝也。民多便利機巧。外文飾而中不慙。內賊仁而外欺蔽。此好禮之過。文勝沒質之所致也。夏道尊命。天道無言。故不煩辭令。事不求備。不大責望于民。民不忘親。夏治所以最近古也。殷人尊神。而禮文未煩。然先罰好尊于民。求備矣。周人以禮強教民。于事鬼神之禮。

未褻其于治人之事。賞爵刑罰極其周悉。無以復加。故曰窮。二代之治。所以不及夏也。君天下。生無私。謂有天下而不與也。死不厚其子。謂以天下傳賢也。有惜怛之愛弟。以悅安之也。有忠利之教。凱以強教之也。親而尊五者。小人尊親之化。其君子六者。君子尊親之化也。恥費。謂不奢。輕實。謂不貪。

按此節論尊親之偏。三代之敝。旨近迂僻。非夫子之言。

子言之。事君先資其言。拜自獻其身。以成其信。是故君有責於其臣。臣有死於其言。故其受祿不誣。其受罪益。



寡子曰事君大言入則望大利小言入則望小利故君子不以小言受大祿不以大言受小祿易曰不家食吉子曰事君不下達不尚辭非其人弗自小雅曰靖共爾位正直是與神之聽之式穀以女子曰事君遠而諫則調也近而不諫則尸利也子曰邇臣守和宰正百官大臣慮四方子曰事君欲諫不欲陳詩云心乎愛矣瑕不謂矣中心藏之何日忘之子曰事君難進而易退則位有序易進而難退則亂也故君子三揖而進一辭而退以遠亂也子曰事君三違而不出竟則利祿也人雖曰不要吾弗信也子曰事君慎始而敬終子曰事君可貴

可賤可富可貧可生可殺而不可使爲亂子曰事君軍旅不辟難朝廷不辭賤處其位而不履其事則亂也故君使其臣得志則慎慮而從之否則執慮而從之終事而退臣之厚禮易曰不事王侯高尚其事子曰唯天子受命于天士受命于君故君命順則臣有順命君命逆則臣有逆命詩云鵲之姜姜鵲之賁賁人之無良我以爲君

此節言臣事君之道先資其言先以言爲資也拜自獻其身將以試其言也蓋言可底績故獻身以行其言言行則信成矣大言謂論道經邦小言謂因事納

誨大利謂功在天下小利謂惠及一物所言小則其  
任小而不可妄覲如爲貧而仕之類所言大則其道  
大而不肯輕試如學焉後臣之類不家食謂食祿也  
下達求通于下也事上而求通于下是朋比也不尚  
辭不以便佞取容也非其人弗自不由匪人進也自  
由也靖共安靖恪恭也正直正直之人式穀以女用  
福祿與汝也遠而諫謂疎遠之臣越職進諫是以諫  
爲諛也尸利主利祿也邇臣近君之臣職在調和輔  
養不以充屬爲忠宰百官之長正已以帥屬也大臣  
謂公卿慮四方謂安定天下邇臣宰皆大臣也守正

慮自君身以及朝廷天下也。欲諫謂可諫君之失，不欲陳謂不可陳已之直瑕。詩作遐，遠也。遠不得相告語也。難進易退，謂進以禮，退以義，則在位者皆師師揖讓。故曰有序易進難退，反是故曰亂。禮主賓相見三揖後進，賓出一辭卽退，以遠亂也。三遠不出，竟屢去不離境也。要希求也。得志則愼慮以敬事也。不得志則熟慮以善終也。終事而退以全其厚，所謂熟慮也。退謂去位，士受命于君，猶天子受命于天，天無不順之命，君命或不順，臣不得阿諛順從也。姜姜，猶疆疆剛也。責責，猶奔奔闕也。詩謂鳥不亂羣，刺衛宣姜。

與公子頑亂匹也

按此節大利小利大祥小祥守和逆命等說皆有疵類非盡聖人之言

子曰君子不以辭盡人故天下有道則行有枝葉天下無道則辭有枝葉是故君子於有喪者之側不能賻焉則不問其所費於有病者之側不能饋焉則不問其所欲有客不能館則不問其所舍故君子之接如水小人之接如醴君子淡以成小人甘以壞小雅曰盜言孔甘亂是用餒談子曰君子不以口譽人則民作忠故君子問人之寒則衣之問人之飢則食之稱人之美則爵之

國風曰心之憂矣於我歸說稅子曰口惠而實不至怨  
菑及其身是故君子與其有諾責也寧有已以怨國風  
曰言笑晏晏信誓旦旦不思其反反是不思亦已焉哉  
子曰君子不以色親人情疏而貌親在小人則穿窬之  
盜也與子曰情欲信辭欲巧

不以辭盡人謂辭不可以槩人也有道無道謂治世  
亂世也世治人皆脩行而好名者多鋪張則行有枝  
葉世亂人爭立言而尚口者多浮華則辭有枝葉枝  
葉皆非根本而辭爲甚故辭不可盡人不能賄而聞  
人費之類亦枝葉也接猶交也水淡而可久醴甘而

易壞餽進食也。諾責謂許諾將來使人責望。已怨謂已往未許人怨恨也。晏晏悅也。旦旦明也。反反覆也。○按不能則不問此深干涉世者耳。非至德之要辭。欲巧尤謬。定非夫子之言。

子言之。昔三代明王皆事天地之神明。無非卜筮之用。不敢以其私褻事上帝。是以不犯日月。不違卜筮。卜筮不相襲也。大事有時日。小事無時日。有筮外事用剛日。內事用柔日。不違龜筮。子曰。牲牲禮樂齊盛。是以無害乎鬼神。無怨乎百姓。子曰。后稷之祀。易富也。其辭恭。其欲儉。其禮及子孫。詩曰。后稷兆祀。庶無罪悔。以迄于今。

子曰大人之器威敬天子無筮諸侯有守筮天子道以筮諸侯非其國不以筮卜宅寢室天子不卜處太廟子  
曰君子敬則用祭器是以不廢日月不違龜筮以敬事  
其君長是以上不瀆於民下不褻於上

事謂祭祀卜筮之用謂如擇日擇尸擇牲之類不犯  
日月謂不以他事妨祭之日月也不違卜筮謂卜筮  
既定則不敢違不相褻謂卜則不筮筮則不卜大事  
祭大神四時有定日如冬至祀圜丘夏至祀方澤之  
類則不復筮小事謂祭小神無常期則筮也外事祭  
百神內事祭祖考剛日柔日說見曲禮惟不違龜筮



是以牲牷禮樂粢盛三者幽無鬼責明無人怨子曰  
二字衍文后稷有稼穡之功堯封于邰始祀宗廟子  
孫遂有天下尊稷配天詳見詩大雅生民篇富福通  
詩云何神不富言后稷本恭儉啓後子孫能率先猷  
則獲福易明祭貴志不貴物也或云易富不多品也  
惟躬耕以供粢盛故易辭恭卽詩云庶無罪悔之辭  
欲儉卽詩云春耒播種等事祿及子孫謂有天下兆  
祀詩作肇祀始祀也大人之器龜筮也威敬猶畏敬  
不敢褻也天子無筮有守龜龜重也諸侯守國以筮  
天子在道路則用筮諸侯在他國不筮不敢問吉凶

于人國也。雖不筮，猶必卜其所居之寢室，防意外也。宅居也。天子在外不卜宅，惟處于諸侯之大廟，敬用祭器，謂大賓客燕饗，用祭祀之器，敬之也不廢日月。請謁必擇期也不違龜筮。卜筮後見也。上不瀆於民，謂君神其道不示民褻也。下不褻於上，謂民敬其事不敢慢上也。

按卜筮先王所以一人心，決猶豫，事有典常，則不卜筮。魯郊卜非禮也。記云：「大事有時日，又云：『事天地神明，無非卜筮之用。』」曲禮：「大饗不卜而周官大宰又云：『祀五帝卜日。』」祀大神示亦如之。曲禮爲正筮法，詳周

易卜不見于經而世以草木無知龜有靈故春秋傳  
謂者短龜長記言重卜附會耳周禮亦先筮後卜要  
之聖人所爲自信者不在龜亦不在筮其所以爲衆  
人信者于龜近于筮遠筮非知易者不能占也

表記終

緇衣第三十三

緇衣取好賢如緇衣語名篇相傳爲公孫尼子作依  
倣聖言而味淺旨不醇引詩書無自得之趣信非聖  
人語

子言之曰爲上易事也爲下易知也則刑不煩矣子曰  
奸賢如緇衣惡惡如巷伯則爵不瀆而民作愿刑不試  
而民咸服大雅曰儀刑文王萬國作孚子曰夫民教之  
以德齊之以禮則民有格心教之以政齊之以刑則民  
有遯心故君民者子以愛之則民親之信以結之則民  
不倍恭以泣之則民有孫心甫刑曰苗民匪用命制以

刑惟作五虐之刑曰法是以民有惡德而遂絕其世也  
子曰下之事上也不從其所令從其所行上好是物下  
必有甚者矣故上之所好惡不可不慎也是民之表也  
子曰禹立三年百姓以仁遂焉豈必盡仁詩云赫赫師  
尹民具爾瞻甫刑云一人有慶兆民賴之大雅曰成王  
之孚下土之式子曰上好仁則下之爲仁爭先人故長  
民者章志貞教尊仁以子愛百姓民致行已以說其上  
矣詩云有棣德行四國順之

上易事則民不欺下易知則君不疑如是則刑可不  
用矣緇衣詩鄭風之首篇國人愛鄭武公而作巷伯

小雅之詩。寺人刺幽王而作。甫刑。卽呂刑。周書篇名。  
周穆王恤刑而作。苗民。三苗國民。匪用命。書作匪用  
靈靈。猶善也。以仁遂。猶言興仁。豈必盡仁。言禹非家  
喻以仁也。引詩書。見上之化下。在表正而已。成王之  
孚。言成其爲天子之信。非但一人一家信之。章志貞  
教。謂明示其好善惡惡之志。躬行守正以教之。尊仁  
以子愛百姓。卽體仁以長人也。故民亦致力躬行。以  
順悅其上。格。詩作覺。德行可覺悟人也。

子曰。王言如絲。其出如綸。王言如綸。其出如綹。弗故大  
人不倡游言。可言也不可行。君子弗言也。可行也不可

言。君子弗行也。則民言不危行。而行不危言矣。詩云。淑慎爾止。不讐于儀。子曰。君子道人以言。而禁人以行。故言必慮其所終。而行必稽其所敝。則民謹於言而慎於行。詩云。慎爾出話。敬爾威儀。大雅曰。穆穆文王。於緝熙敬止。子曰。長民者。衣服不貳。從容有常。以齊其民。則民德壹。詩云。彼都人士。狐裘黃黃。其容不改。出言有章。行歸于周。萬民所望。子曰。爲上可望而知也。爲下可述而志也。則君不疑於其臣。而臣不惑於其君矣。尹吉告曰。惟尹躬及湯。咸有壹德。詩云。淑人君子。其儀不貳。子曰。有國家者。章善癉坦惡。以示民厚。則民情不貳。詩云。靖

共爾位好是正直子曰上人疑則百姓惑下難知則君  
長勞故君民者章好以示民俗慎惡以御民之淫則民  
不惑矣臣儀行不重辭不援其所不及不煩其所不知  
則君不勞矣詩云上帝板板下民卒瘁小雅曰匪其止  
共維王之叩子曰政之不行也教之不成也爵祿不足  
勸也刑罰不足恥也故上不可以褻刑而輕爵康誥曰  
敬明乃罰甫刑曰播刑之不迪

王言始出甚細布之于下風行漸遠其末漸大綸大  
于絲綽大于綸游言浮浪不根之言危猶越也道人  
以言謂以言教民禁人以行謂防民之行言雖是而



終不可踐。則當慮行雖善而久必有敝。則當稽乃可。以道民禁民也。穆穆深遠意。於歎辭。緝熙繼明也。敬止敬其容止。衣服不貳有定式也。從容有常舉動無躁妄也。民德壹順治不擾也。行歸于周歸于忠厚也。上可望而知。故臣易事。下可述而志。故君不疑。尹吉當作尹告。伊尹告太甲之辭。章善廬惡。謂善者揚之。不善者病之。厚不偷也。儀度也。臣度其君之所能行者。而不重煩以辭說。不扳引君之所不及。不煩瀆君之所不知。納牖善道。則君不勞矣。引詩言天反常則民盡病。所謂上疑則下惑也。引小雅言小人不能恭。

敬惟爲王叩病所謂下煩則君勞也棄刑猶煩刑播  
刑之不迪本作播刑之迪言施刑必順理也

子曰大臣不親百姓不寧則忠敬不足而富貴已過也  
大臣不治而邇臣比矣故大臣不可不敬也是民之表  
也邇臣不可不慎也是民之道也君母以小謀大母以  
遠言近母以內圖外則大臣不怨邇臣不疾而遠臣不  
蔽矣葉公之顧命曰母以小謀敗大作母以嬖御人疾  
莊后母以嬖御士疾莊士大夫卿士子曰大人不親其  
所賢而信其所賤民是以親失而教是以煩詩云彼求  
我則如不我得執我仇仇亦不我力君陳曰未見聖若

已弗克見既見聖亦不克由聖

大臣不親愛其君百姓不得安寧以君于大臣忠敬不足寵利太過也君不敬其臣臣不忠其君惟富貴是圖則君失御臣之道而大臣不治恃權怙勢而近臣阿比故人君于大臣不可不敬敬選擇欽崇也表標也道由也邇臣爲君好惡所係民必由之毋以小臣謀大臣毋以遠臣間近臣毋以內臣圖外臣則君相同心內無猜忌外無壅蔽百姓安寧矣葉公楚葉縣尹沈諸梁字子高顧命臨死顧其臣子命之之辭莊正也莊后嫡夫人之賢者莊士大夫卿士正人之

爲大夫卿士者不親賢而信羣小是以嬖人疾莊士也親失教煩謂民不親上而號令多也

子曰小人溺於水君子溺於口大人溺於民皆在其所繫也夫水近於人而溺人德易狎而難親也易以溺人口貴而煩易出難悔易以溺人夫民闇於人而有鄙心可敬不可慢易以溺人故君子不可以不慎也太甲曰毋越厥命以自覆也若虞機張往省括于厥度則釋兌說命曰惟口起羞惟甲冑起兵惟衣裳在笥惟干戈省厥躬太甲曰天作孽可違也自作孽不可以逭尹吉告曰惟尹躬天見于西邑夏自周有終相亦惟終

德易狎而難親。謂水也。民蔽于人情鄙陋不通。易于  
爲亂不可慢也。太甲以下四引書明不可不慎之義。  
虞虞人機弩牙括矢本也。度法也。釋舍矢也。口起羞  
甲冑起兵。言口能招侮興戎。衣裳在笥。干戈省躬。言  
不以冠裳從容。遂忘備也。尹吉當作尹告。天當作先。  
伊尹言已先見湯于夏之西。邑夏都安邑。毫在其西。  
故曰西。邑夏忠信曰周湯。自以忠信有終。故尹爲相。  
亦能有終也。

子曰。民以君爲心。君以民爲體。心莊則體舒。心肅則容  
敬。心好之。身必安之。君好之。民必欲之。心以體全。亦以

體傷君以民存亦以民亡詩云昔吾有先正其言明且  
清國家以寧都邑以成庶民以生誰能秉國成不自爲  
正卒勞百姓君雅曰夏日暑雨小民惟曰怨咨冬祈寒  
小民亦惟曰怨

昔吾五句今詩無之誰能三句見小雅節南山之篇  
君雅當作君牙怨咨書作怨咨祈作祁大也末句脫  
咨字

按此篇與前表記所引詩書語皆無深味而引書多  
世所傳古文書中語

子曰下之事上也身不正言不信則義不壹行無類也

子曰言有物而行有格也是以生則不可奪志死則不可奪名故君子多聞質而守之多志質而親之精知畧而行之君陳曰出入自爾師虞庶言同詩云淑人君子其儀一也

義不一從違不定也行無類臧否乖方也質猶擇也多聞則擇取其善者篤信之志記也親篤信也多志則擇取其善者篤信之知欲其精行欲其慎畧猶約也慎行之意君陳古文周書篇名師衆也虞度也庶言同謂衆論合也

子曰唯君子能好其正小人毒其正故君子之朋友有

鄉其惡有方是故邇者不惑而遠者不疑也詩云君子好仇子曰輕絕貧賤而重絕富貴則好賢不堅而惡惡不著也人雖曰不利吾不信也詩云朋友攸攝攝以威儀子曰私惠不歸德君子不自留焉詩云人之好我示我周行

正謂正人惟君子能好之小人則毒害之君子朋友有鄉謂所好必善類也其惡有方謂所惡必不善也好惡得正故爲善者安而遠近不疑好仇猶言良朋攝猶助也引詩言朋友相助在賢不在富貴也私惠不歸德言小惠不合于德義君子不留于已周行猶



言至道

子曰苟有車必見其軌苟有衣必見其敝人苟或言之必聞其聲苟或行之必見其成葛覃曰服之無射子曰言從而行之則言不可飾也行從而言之則行不可飾也故君子寡言而行以成其信則民不得大其美而小其惡詩云白圭之玷尚可磨也斯言之玷不可爲也小雅曰允也君子展也大成君奭曰在昔上帝周田觀文王之德其集大命于厥躬子曰南人有言曰人而無恆不可以爲卜筮古之遺言與龜筮猶不能知也而況於人乎詩云我龜既厭不我告猶兌命曰爵無及惡德民

立而正事。純而祭祀。是爲不敬。事煩則亂。事神則難。易曰：不恆其德，或承之羞。恆其德，貞婦人吉，夫子凶。

有車必見其軾，有衣必見其敝，喻誠之不可揜也。引葛覃之詩，言實有是衣，乃可久服而不厭也。意不其協大其美，謂誇張其美，小其惡，謂微隱其惡。君奭周書篇名。周田猶言徧蒐簡擇之意。今書作上帝，割申勸寧王之德，言天割絕殷紂，重獎文王之德。集大命于其身也，引以徵實德之義，亦不甚協。恆卽實德，德實則可久，不可爲卜筮。言人多機變，鬼神不能測也。引說命與今文異。惡德卽不恆之類。如爵之，則民將

起而效尤以惡德爲正事純用此以祭祀是欺罔鬼神也惡德之人事煩擾亂故難以事鬼神不恆承羞解見周易恆卦爻辭偵作貞

緇衣終

奔喪第三十四

此居他國聞喪奔赴之禮五服之喪皆有奔此篇多  
後人卽事義起不必盡古也

奔喪之禮始聞親喪以哭答使者盡哀問故又哭盡哀  
遂行日行百里不以夜行唯父母之喪見星而行見星  
而舍若未得行則成服而后行過國至竟哭盡哀而止  
哭辟市朝望其國竟哭至於家入門左升自西階殯東  
西面坐哭盡哀括髮袒降堂東卽位西鄉哭成踊襲經  
于序東絞帶反位拜賓成踊送賓反位有賓後至者則  
拜之成踊送賓皆如初衆主人兄弟皆出門出門哭止

闕門相者告就次於又哭括髮祖成踊於三哭猶括髮  
祖成踊三日成服拜賓送賓皆如初

古者吉行日五十里奔喪倍之不夜行孝子爲親喪  
自重也見星謂晨昏星出早行晏息但不宵奔若輕  
喪奔不必見星矣過國至竟謂所經過國之界上昔  
去親存今返親亡感觸盡哀也市朝邑居也辟不哭  
恐驚衆也望其國竟將至本國界也入家門自外入  
以西爲左將趨西階如親存也禮親在升降不由阼  
言括髮不言免者父喪脫髦括麻徒首不加布也降  
堂東卽位孝子位在阼階下也襲經掩襲所祖之衣

著麻經也序東堂東牆端絞帶絞其要經麻之下垂者不散也喪禮既小斂帶經散麻三日乃絞奔喪歸不散者後期不見柩殺也反位自東序反東階下之位凡拜賓皆就賓位拜畢乃反位哭踊成踊九踊成三也皆如初謂賓後至者拜之成踊送反位皆如前賓也皆出事畢退也闔門闔殯宮門相贊禮者告就次告奔者使就門外倚廬之次此初至一哭也又哭謂明日三哭謂又明日三日成服謂三哭之明日也成服則不括髮矣

奔喪者非主人則主人爲之拜賓送賓奔喪者自齊衰

以下入門左中庭北面哭盡哀免麻于序東卽位袒與主人哭成踊於又哭三哭皆免袒有賓則主人拜賓送賓丈夫婦人之待之也皆如朝夕哭位無變也

非主人謂非父母之喪如期功以下之親自有嫡子爲主人賓客弔皆主人拜送奔者不爲主也齊衰以下謂如出母繼父之類門左見前入門不升階但于堂下中庭北面向殯哭免麻謂首免以布而加麻經也丈夫婦人謂主人內外男女之在喪次者待之謂待此奔喪者男女皆如朝夕哭之位不改易也蓋待賓則以變爲敬奔者親屬不以賓禮也

奔母之喪西面哭盡哀括髮袒降堂東卽位西鄉哭成踊襲免經于序東拜賓送賓皆如奔父之禮於又哭不括髮

西面哭謂升堂坐殯東西面及他禮皆與父喪同但父括麻襲經不加紼母則襲經而加紼父三哭猶括髮母明日又哭卽不括髮所以殺也

按喪服小記奔母喪不括髮與此異

婦人奔喪升自東階殯東西面坐哭盡哀東塾卽位與主人拾踊

婦人謂姑姊妹女子子之類升自東階別于男子也



鄭註謂東面之階。鑿也。東鑿謂于堂上之東脫其筭而鑿也。卽位位在堂上也。拾踊更迭踊也。所以賓客之

奔喪者不及殯。先之墓北面坐哭盡哀。主人之待之也。卽位於墓左。婦人墓右。成踊盡哀。括髮東卽主人位。經綬帶哭成踊。拜賓反位成踊。相者告事畢。遂冠歸入門。左北面哭盡哀。括髮袒成踊。東卽位拜賓成踊。賓出主人拜送。有賓後至者則拜之。成踊送賓如初。衆主人兄弟皆出門。出門哭止。相者告就次。於又哭。括髮成踊。於三哭猶括髮成踊。三日成服於五哭。相者告事畢爲母

所以異於父者。宜括髮其餘。免以終事。他如奔父之禮。齊衰以下不及殯。先之墓。西面哭盡哀。免麻于東方。卽位與主人哭成踊。襲有賓則主人拜賓送賓。賓有後至者。拜之如初。相者告事畢。遂冠歸。入門左北面哭盡哀。免袒成踊。東卽位拜賓成踊。賓出主人拜送於又哭免袒成踊。於三哭猶免袒成踊。三日成服於五哭。相者告事畢。

不及殯。謂衆主人旣葬而後歸者。家無尸柩。故先之墓。婦人主婦以下也。旣云主人卽位于墓左。奔者又東卽主人位。蓋主人與奔者皆于也。事畢。謂哭墓事。

畢遂冠歸謂道路不可待首必加冠而行五哭謂成服之明日哭告事畢告奔喪事畢壹括髮謂奔母喪但入門一哭括髮上節云又哭不括髮是也西面哭哀殺于北面也免麻免以布而加麻經也與主人哭成踊襲則是免麻時袒也又哭三哭皆言免袒成踊上節奔父喪又哭三哭但云括髮成踊不言袒袒可知鄭謂此二袒字衍文非也

聞喪不得奔喪哭盡哀問故又哭盡哀乃爲位括髮袒成踊襲經絞帶卽位拜賓反位成踊賓出主人拜送于門外反位若有賓後至者拜之成踊送賓如初於又哭

括髮袒成踊於三哭猶括髮袒成踊三日成服於五哭拜賓送賓如初若除喪而后歸則之墓哭成踊東括髮袒經拜賓成踊送賓反位又哭盡哀遂除句於家不哭主人之待之也無變於服與之哭不踊自齊衰以下所以異者免麻

除喪而后歸已經喪于外也遂除卽墓所除之主人無變於服謂在家者仍吉服不變也此言父母之喪自齊衰以下奔喪在除服後者禮與此同惟著免經麻而已非父母之喪不括髮所以異也

凡爲位非親喪齊衰以下皆卽位哭盡哀而東免經卽

位袒成踊。襲衣。賓反位。哭成踊。送賓反位。相者告就次。三日五哭卒。主人出送賓。衆主人兄弟皆出門哭止。相者告事畢。成服拜賓。若所爲位家遠。則成服而往。齊衰望鄉而哭。大功望門而哭。小功至門而哭。緦麻卽位而哭。哭父之黨於廟。母妻之黨於寢。師於廟門外。朋友於寢門外。所識於野。張帷。凡爲位不奠。哭天子九。諸侯七。卿大夫五。士三。大夫哭諸侯。不敢拜賓。諸臣在他國爲位而哭。不敢拜賓。與諸侯爲兄弟。亦爲位而哭。凡爲位者壹袒。

此節記聞喪者爲位哭之禮。旅次無尸柩。設奠座無。

倚廬設孝子哀次與哭泣行禮之次皆所謂位也。聞父母之喪不待爲位哭。齊衰以下之喪行禮卽位時哭。哭畢至東序加免經復位袒踊畢襲衣就賓位拜。又復位哭踊送賓出。又復位皆爲位之禮也。三日五哭。謂初聞喪哭。明日朝夕哭。又明日朝夕哭。共五不俟成服五哭終者。哀殺于親喪。此在外聞喪哭之禮也。主人出送賓以下奔喪至家之禮。成服拜賓三日。後成服于家也。若在外未得歸。所爲位去家遠則卽所爲之位成服而後歸。齊衰望鄉以下四者皆奔喪哭之禮。哭父之黨以下在家聞喪爲位之禮。說見檀

弓伯高死于衛章凡聞喪爲死者寘位不設饋奠以  
虛位寘不附也哭天子諸侯亦爲位哭也九哭九日  
哭每日一哭餘倣此大夫哭諸侯哭舊君也不敢拜  
賓避爲主也在地國奉使也與諸侯爲兄弟謂同姓  
卿大夫仕異國者壹袒始聞喪一哭袒明日以往則  
不袒與父母之喪異

按此節文義鄭解破裂欠通或疑有關文未也

所識者弔先哭于家而後之墓皆爲之成踊從主人北  
面而踊凡喪父在父爲主父沒兄弟同居各主其喪親  
同長者主之不同親者主之聞遠兄弟之喪旣除喪而

後聞喪免袒成踊拜賓則尚左手無服而爲位者唯嫂  
叔及婦人降而無服者麻凡奔喪有大夫至袒拜之成  
踊而后襲於土襲而后拜之

所相識之人死既葬而往弔則先哭于其家而後之  
墓先成禮而哀稍緩也主人墓左西面倡踊客從之  
北面向墓踊凡喪以下四者皆言喪主人不在之禮  
如妻子之喪父在則父爲主兄弟同居居者各爲其  
出者主親同長者主之如親喪則衆子之長者代爲  
主親不同親者代主之遠兄弟小功總麻之喪雖過  
期聞之必變但拜賓從吉以左手又右手上猶吉事



尚左也。凡爲位哭者皆有服之親。唯叔于嫂無服。及族姑姊妹旣嫁者。總麻降而無服。哭則爲弔服。麻謂總麻環經。凡弔者皆得服之。凡奔喪者初至袒降。將哭踊。遇大夫來弔。先拜大夫而後成踊。乃襲衣敬尊者。迫也。如遇士弔。先成踊。襲其袒衣。然後拜之。尊卑殊也。

奔喪終

問喪第三十五

前半敘禮後半問禮

親始死雞斯徒跣扱上衽交手哭惻怛之心痛疾之意  
傷腎乾肝焦肺水漿不入口三日不舉火故鄰里爲之  
糜粥以飲食之夫悲哀在中故形變於外也痛疾在心  
故口不甘味身不安美也三日而斂在牀曰尸在棺曰  
柩動尸舉柩哭踊無數惻怛之心痛疾之意悲哀志慙  
氣盛故袒而踊之所以動體安心下氣也婦人不宜袒  
故發曾擊心爵踊殷殷田田如壞牆然悲哀痛疾之至  
也故曰辟踊哭泣哀以送之送形而往迎精而反也其

往送也望望然汲汲然如有追而弗及也其反哭也皇皇然若有求而弗得也故其往送也如慕其反也如疑求而無所得之也入門而弗見也上堂又弗見也入室又弗見也亡矣喪矣不可復見已矣故哭泣辟踊盡哀而止矣心悵焉愴焉惚焉愴焉心絕志悲而已矣祭之宗廟以鬼享之徼幸復反也成壙而歸不敢入處室居於倚廬哀親之在外也寢苦枕塊哀親之在土也故哭泣無時服勤三年思慕之心孝子之志也人情之實也雞斯作笄纚古字通用笄簪也以管髮纚薄繒以韜髮親始死孝子投冠止存笄纚旣小斂盡脫之而括

髮以麻不冠曰徒不履曰跣扱上衽謂以衣前襟插帶間便于號踊匆劇之狀交手哭以兩臂相交而哭傷腎乾肝焦肺者乾甚于傷焦甚于乾形變于外卽笄纒扱衽交手也口不甘味卽水漿不入口不舉火也慙悶同悲哀之極志慙不舒氣鬱克盛踊跳以下氣也婦人開其冑衣手擊其心足跳踊如爵之躍殷殷田田擊之聲也哀以送送葬也迎精反旣葬迎神歸也祭之宗廟謂旣虞而附祭納主于廟也成墳而歸旣葬而歸也哀親在外故不敢處于內哀親在土故不忍寢于床服勤三年謂三年困苦也

按檀弓子游曰歎斯辟辟斯踊皆情之自然今謂爲動體安心下氣而踊迂也

或問曰死三日而后斂者何也曰孝子親死悲哀志懣故匍匐而哭之若將復生然安可奪而斂之也故曰三日而后斂者以俟其生也三日而不生亦不生矣孝子之心亦益衰矣家室之計衣服之具亦可以成矣親戚之遠者亦可以至矣是故聖人爲之斷決以三日爲之禮制也或問曰冠者不肉袒何也曰冠至尊也不居肉袒之體也故爲之免以代之也然則禿者不免偃聲於上者不袒跛者不踊非不悲也身有錮疾不可以備禮也

故曰喪禮唯哀爲主矣。女子哭泣悲哀，擊膺傷心。男子哭泣悲哀，稽顙觸地，無容哀之至也。或問曰：免者以何爲也？曰：不冠者之所服也。禮曰：童子不緦，唯當室緦。緦者，其免也。當室則免而杖矣。或問曰：杖者何也？曰：竹、桐一也。故爲父苴杖，苴杖，竹也；爲母削杖，削杖，桐也。或問曰：杖者以何爲也？曰：孝子喪親，哭泣無數，服勤三年，身病體羸。雷以杖扶病也。則父在，不敢杖矣；尊者在故也。堂上不杖，辟尊者之處也。堂上不趨，示不遽也。此孝子之志也。人情之實也。禮義之經也。非從天降也，非從地出也。人情而已矣。

此皆記者設爲問答不忍斂者孝子之情必斂者聖人之禮聖人爲之斷決則是聖人猶未忍焉甚言至情之難奪也孝子心衰望不遂也家室之計營費也衣服斂衣服冠者不肉袒謂哭踊肉袒則不冠以布爲纁代冠也吉禮袒衣不見肉如袒割牲之類則冠如故禿者以下明袒免踊皆生于情之哀苟情至則因時損益可也故禿者無髮則不免偃者形屈則不袒跛者足病則不踊故曰以哀爲主女子有疾不能踊則哭泣悲哀擊臂傷心男子不能踊則稽顙觸地無爲容儀斯亦哀之至矣免作纁謂以麻布一幅纏

頭免冠而後加此。故曰不冠者之所服。如童子未冠不免可也。惟童子早孤。當家爲喪主。有成人之禮。則加免。總總麻服。童子幼不備禮。輕喪則不服也。當室則總。總則亦免。免則亦杖矣。苴者。圓而麤惡之狀。削者。方而稜瘦之狀。父在不敢杖。謂爲母杖者。見父則輯之。不敢當父前扶杖也。堂上不趨。亦謂父在也。孝子之志。以下六句。甚言禮之貴義。不以文可謂達禮之論矣。

按孝子親始死。投冠筭緦。容之變也。非爲肉袒不冠也。初喪必免。免有常而袒無常。豈因袒而免。不袒則



不免邪。免而肉袒示凶變也。今謂至尊不居肉袒之體。非通論也。

問喪終

服問第三十六

篇內無問而曰服問者所記皆答問之辭也

傳曰有從輕而重公子之妻爲其皇姑有從重而輕爲妻之父母有從無服而有服公子之妻爲公子之外兄弟有從有服而無服公子爲其妻之父母

傳古禮書今大傳服術有從服說見本篇但未舉其人故于此明之公子謂諸侯妾之子妾子壓于適父在爲其母練冠父沒爲其母大功而其妻則不論父在否皆得爲其夫之母期故曰從輕而重謂本從其夫服而反重于夫也皇尊稱猶祭法之云皇考也妻

爲其父母齊衰重也。夫從服則緦麻是從重而輕也。公子之外兄弟卽公子妻之兄弟也。妻不言兄弟而言公子者從夫也。禮爲外父母總則外兄弟無服而其妻則女子子之適人者爲其昆弟之爲父後者期。是從夫之無服而有服也。公子厭于君降其私親不得爲其妻父母服而公子之妻仍服之是從妻之有服而已無服也。

按鄭謂外兄弟爲公子之外祖父母從母非也。旣稱兄弟何謂爲祖父母從母乎。

傳曰母出則爲繼母之黨服。母死則爲其母之黨服。爲

其母之黨服則不爲繼母之黨服

母出謂已母被父出父再娶繼母出母之服雖不絕而母黨之義已絕則繼母之黨卽母黨矣故爲之服母死謂已母死則母子之恩猶生故爲已母之黨服旣爲已母之黨服則繼母之黨無服矣大傳無此語豈古別有是傳與

三年之喪旣練矣有期之喪旣葬矣則帶其故葛帶經期之經服其功衰有大功之喪亦如之小功無變也麻之有本者變三年之葛旣練遇麻斷本者於免經之旣免去經每可以經必經旣經則去之小功不易喪之練

冠如免則經其總小功之經因其初葛帶總之麻不變  
小功之葛小功之麻不變大功之葛以有本爲稅退殯  
長中變三年之葛終殯之月筭而反三年之葛是非重  
麻爲其無卒哭之稅下殯則否

三年之喪既練祭後又當期喪既葬之後則要帶三  
年練之葛帶首戴期新易之葛經身被練後之功衰  
蓋三年與期既葬男子皆以葛易麻而期喪既葬之  
葛輕于三年既練之葛故仍帶三年練之故葛帶也  
云故者期初喪用麻變葛既葬還舊曰故也首經則  
三年練後已除而期喪方新須戴期之經也功衰謂

以大功布七升。或八九升爲衰。蓋三年練後與大功九月之衰布升數畧同。故曰功衰。而三年練之功衰比期旣葬之功衰畧重。故仍服其三年練之功衰也。有大功之喪亦如之者。謂三年喪練後遇大功之喪始死亦麻。旣葬帶其故葛帶。而經大功之葛經服其功衰同也。小功無變。謂先有大喪。今遭小功。雖初喪亦不用麻變葛帶。不以輕服損重服也。麻之有本者連根之麻。合絞爲帶。服之重者大功以上皆用之。三年之練葛復遇此喪則以此麻易之。其餘若小功以下之經麻去本者情輕不得以變三年之葛也。喪服

小記云斬衰之葛與齊衰之麻同齊衰之葛與大功之麻同麻同皆兼服之卽此也如三年之喪旣練復遇小功去本之麻雖不可以變三年之葛帶然于初喪當免時以小功麻經加首卒事而後去之蓋三年喪旣練無首經所以可經每於斂殯啓葬有事當經之時必經卒事則去仍服三年之練服也三年喪之練冠遇小功以下之喪則不易必大功乃可易雜記云三年之練冠以大功之麻易之是也如小功初喪免經則戴小功之麻首經至要帶雖初喪亦不變練之葛帶也總之麻不變小功之葛小功之麻不變大

功之葛者。總小功麻皆斷本而輕。不以輕麻易重葛也。稅變易也。以此易彼曰稅。麻之有本者。乃可變舊葛言總小功麻。雖不得變葛。而總小功降服之麻。情重者可變也。本服大功。死于長殤。則降服小功。死于中殤。則降服總麻。如此者。服輕情重。乃變三年之葛。而著殤服之麻。經帶也。小功終五月。總麻終三月。筭足。乃還反三年之葛帶。是非重麻者。謂小功總服麻。皆絕本。輕不當易三年葛。所以易終筭者。非故重之以降服小功總。無卒哭卽葛之禮。但以本麻終筭情重。故易三年葛。以麻終也。若夫大功下殤。亦當降



服緦麻雖亦無卒哭之稅然情輕則不復易麻終等與成人之緦麻小功等皆不以易三年之葛卽上文所謂小功無變者也

君爲天子三年夫人如外宗之爲君也世子不爲天子服君所主夫人妻大子適婦大夫之適子爲君夫人大子如士服君之母非夫人則羣臣無服唯近臣及僕隸乘從服唯君所服服也公爲卿大夫錫衰以居出亦如之當事則弁經大夫相爲亦然爲其妻往則服之出則否凡見人無免經雖朝於君無免經唯公門有稅脫齊衰傳曰君子不奪人之喪亦不可奪喪也傳曰罪多而

刑五喪多而服五上附下附列也

諸侯爲天子喪斬衰三年諸侯夫人于天子喪如諸侯之同宗女嫁外姓者于諸侯喪皆服期也世子諸侯大子不爲天子喪爲有繼世之嫌也君所主謂諸侯所主之喪惟夫人與大子及大子之妻是君之適婦也言夫人妻者明嫡妻乃爲夫人三者皆正雖君之貴必爲之主其喪則大夫以下于適妻子婦亦可知也大夫之適子爲君爲君夫人及大子三喪皆如士服士于君服斬于夫人大子服期也君母爲嫡夫人則君爲服三年臣從君服期如非嫡夫人則君服

總羣臣無服唯近臣與御車之僕及車右之驂乘此輩君服亦服君總亦總耳公於大臣之喪既成服後平居著錫衰錫衰者以總布洗治光澤爲衰也出謂有事他出亦衣之不言冠猶吉也當事謂弔或視斂殯葬則弁上加經大夫於大夫之喪亦出入錫衰當事弁經也爲其妻謂君於卿大夫妻及卿大夫自相爲其妻亦弁經錫衰弔但出則除之凡見人無免經謂男子重首經雖見人不脫雖朝君亦不脫也唯入公門有齊衰則暫脫之齊衰以上亦不脫也不奪人喪故君不責臣變服不可奪喪故孝子不可變服從

人刑有五謂墨劓剕宮大辟服有五謂斬齊大小功  
總麻罪重者附上刑罪輕者附下刑大功以上附于  
親小功以下附于疏列謂罪與喪等雖多皆不越上  
下二等之列也

按諸侯世子不爲天子服此禮近迂大夫適子爲君  
服如士安得諸侯世子於天子獨無服乎

服問終

間傳第三十七

間傳記居喪間儀節也

斬衰何以服苴苴惡貌也所以首其內而見諸外也斬衰貌若苴齊衰貌若臬大功貌若止小功總麻容貌可也此哀之發於容體者也斬衰之哭若往而不反齊衰之哭若往而反大功之哭三曲而偯倚小功總麻哀容可也此哀之發於聲音者也斬衰唯而不對齊衰對而不言大功言而不議小功總麻議而不及樂此哀之發於言語者也斬衰三日不食齊衰二日不食大功三不食小功總麻再不食士與斂焉則壹不食故父母之喪

既殯食粥朝一溢米莫一溢米齊衰之喪疏食水飲不食菜果大功之喪不食醯醬小功緦麻不飲醴酒此哀之發於飲食者也父母之喪既虞卒哭疏食水飲不食菜果期而小祥食菜果又期而大祥有醯醬中月而禫禫而飲醴酒始飲酒者先飲醴酒始食肉者先食乾肉父母之喪居倚廬寢苦占枕塊不說脫經帶齊衰之喪居望室下剪不納大功之喪寢有席小功緦麻牀可也此哀之發於居處者也父母之喪既虞卒哭主柱主楣剪屏下剪不納期而小祥居望室寢有席又期而大祥居復寢中月而禫禫而牀斬衰三升齊衰四升五升六

升大功七升八升九升小功十升十一升十二升總麻  
十五升去其半有事其縗無事其布曰總此哀之發於  
衣服者也斬衰三升既虞卒哭受以成布六升冠七升  
爲母疏衰四升受以成布七升冠八升去麻服葛葛帶  
三重期而小祥練冠緇緣要經不除

服苴謂斬衰苴麻經苴竹杖也麻有子者曰苴苴者  
麤惡臃腫之狀故曰惡貌首猶本也首其內哀痛不  
乎內未見乎外也臬牡麻無子曰牡麻色皆枯黯  
而牡麻狀瘦削禽鳥牡者亦然竹杖苴桐杖削義亦  
以此止者惆悵停止之意容貌謂如平常容貌也往

而不反一哭聲斷不續也往而反聲絕復回也三曲而俵聲曲折偏倚也哀容哀聲從容唯而不對應而不答也不言不先發言不議不泛論不及樂不譚音樂三不食再不食三餐二餐不食也喪大記云期之喪三不食五月三月之喪壹不食再不食與此小異大功不食醯醬小功總不飲醴酒皆謂初喪也不食醯醬則不食肉可知不飲醴酒則不飲醇酒可知中月而禫謂大祥後間一月而禫蓋二十五月大祥二十七月禫也始飲酒者先飲醴酒由淡而醇也始食肉者先食乾肉由薄而厚也皆不急欲之義不說經



帶行住坐臥不脫也。芊，蒲席。翦，翦使齊。不納，不編藏其剪頭于內也。柱楣，豎倚廬之木于楣間也。翦屏，翦齊屏蔽倚廬之亂草也。升，把也。詩云：蕃衍盈升。盈，一手曰升。兩手曰掬。牽布者，以八十縷爲一升。正服，斬衰布三升。凡二百四十縷。義服，斬衰三升半。齊衰，降服四升。正服五升。義服六升。大功，降服七升。正服八升。義服九升。小功，降服十升。正服十一升。義服十二升。總麻，降正義皆十五升。而去其半，則六百縷也。所以少于大小功者，大小功之八升至十二升，縷皆不治。總麻六百縷，與朝服十五升之縷細同，皆煮治而

後織故曰有事其縷。所以減半也。事其布。謂織成布。加洗治。則爲錫。總不洗治。所以差重于錫也。受承也。以多承少。以大承小。斬衰布。初喪二百四十縷。古布幅廣二尺二寸。則是布一寸有奇。止得十二縷。如網。罟然。故不成布。旣葬而虞卒哭後。哀少殺。乃受以六升布。四百八十縷。則一寸有奇。得二十四縷。粗成布。故曰成布六升也。凡喪服冠布。細于衰布。葬後衰布之升數。用初喪冠布之升數。如斬衰初喪三升。冠六升。葬後衰六升。冠七升。齊衰初喪四升。冠七升。葬後衰七升。冠八升也。去麻服葛。謂葬後男子要去麻帶。

而易葛帶。婦人首去麻經而戴葛經也。葛帶男子之服。檀弓云。婦人不葛帶。三重。謂三股重絞。比前麻帶稍細。婦人葛經同可知。及期年以葬後之冠布爲衰。斬衰七升。齊衰八升。以練熟麻布爲冠。又以爲深衣。用淺紅色緣領袖。檀弓曰。練衣黃裏。纁緣。要經。卽葛要經。不除。要經則首經除可知矣。

按練冠有吉凶。大古白冠用布。吉凶皆布也。後世吉冠用帛。凶冠用布。曾子問云。古天子練冠。燕居帛也。此小祥練冠布也。大祥縞冠。帛之白而稀薄者也。練衣纁緣黃裏。近于列采。小祥葛經未除。用此無乃大

驟與

男子除乎首。婦人除乎帶。男子何爲除乎首也。婦人何爲除乎帶也。男子重首。婦人重帶。除服者先重者。易服者易輕者。又期而大祥。素縞麻衣。中月而禫。禫而緇。無所不佩。易服者何爲易輕者也。斬衰之喪。既虞卒哭。遭齊衰之喪。輕者包。重者特。既練。遭大功之喪。麻葛重。齊衰之喪。既虞卒哭。遭大功之喪。麻葛兼服之。斬衰之葛。與齊衰之麻同。齊衰之葛。與大功之麻同。大功之葛。與小功之麻同。小功之葛。與緦之麻同。麻同。則兼服之。兼服之。服重者。則易輕者也。

除除喪服也首首經帶要經陽在上故男子童首陰在下故女子重要男子小祥先除首經女子小祥先除要帶易服謂卒哭後以葛易麻男子要輕易其要經女子首輕易其首經素縞卽玉藻云縞冠素紕旣祥之冠解見本篇麻衣以細麻布爲深衣大祥之服中月而禫謂大祥後間一月禫祭服除也織布帛之細者無所不佩吉服之飾論語云去喪無所不佩易服者易輕者謂卒哭後男要女首輕皆易葛而男首女要仍麻不改所以者何喪重則服重者不易復遭輕喪輕者因時變易也故斬衰旣虞卒哭男要女首

皆易葛更遭齊衰之喪則男易齊衰之麻帶女易齊衰之麻經而斬衰卒哭之葛包乎其中矣蓋其麻葛大小正同則麻可以包葛至男首女要之麻特仍舊雖遭齊衰之喪無容易也特獨也專也不易之稱如斬衰及期既練男經女帶重者已除獨存男帶女經之葛輕者而又遭大功不斷本之麻則首以麻易練冠要以麻易葛帶終筭還服故葛故曰麻葛重也如齊期之喪虞卒哭後復遭大功之麻其日月不及是筭則首與要葛與麻兩者隨時兼服所以者何五服麻葛遞降齊衰之麻與斬衰之葛同故斬衰之葛遇

齊衰之麻麻可包葛也大功之麻與齊衰之葛同故  
齊衰之葛遇大功之麻麻葛可兼服也所謂兼服之  
者男經女帶重仍麻不必易惟男帶女經輕既葛則  
易麻兼服之也舊註未了然前篇云小功總無卒哭  
之稅此又云小功之葛者儀禮降小功情重以麻終  
算無葛正小功則有葛

間傳終

三年問第三十八

問三年內喪服久近之義本荀卿禮論之文

三年之喪何也曰稱情而立文因以飾羣別親疏貴賤之節而弗可損益也故曰無易之道也創鉅者其日久痛甚者其愈遲三年者稱情而立文所以爲至痛極也斬衰苴杖居倚廬食粥寢苦枕塊所以爲至痛飾也三年之喪二十五月而畢哀痛未盡思慕未忘然而服以是斷之者豈不送死有已復生有節也哉凡生天地之間者有血氣之屬必有知有知之屬莫不知愛其類今是大鳥獸則失喪其羣匹越月踰時焉則必反巡過其



故鄉翔回焉鳴號焉蹠蹠焉蹠蹠逐馬蹠蹠焉然後乃能去  
之小者至於燕雀猶有啁噍之頃焉然後乃能去之故  
有血氣之屬者莫知於人故人於其親也至死不窮將  
由夫患邪淫之人與則彼朝死而夕忘之然而從之則  
是曾鳥獸之不若也夫焉能相與羣居而不亂乎將由  
夫脩飾之君子與則三年之喪二十五月而畢若駟之  
過隙然而遂之則是無窮也故先王焉爲之立中制節  
壹使足以成文理則釋之矣

三年之喪包五服于中羣謂五服衆人貴賤謂降絕  
之等弗可損益言禮不可易也一期十二月再期二

十四月生與來日故除初喪之月不算實二十五月也間一月而禫是二十七月也于此不斷則孝子送死之情無已還生之期無節所以必斷也大鳥獸如鴻鴈麋鹿之類啁噍鳥聲然後去之謂喪其羣匹哀久而後去也不肖者用情薄親朝死夕忘所謂患邪淫之人不及于禮者亂之道也賢者用情厚哀雖久而若暫二十五月以爲未足過于禮者也亦非文理之中故先王立中制節使過者就不肖者勉歸于一以成文順理于天命人心可以解釋而無凝滯矣然則何以至期也曰至親以期斷是何也曰天地則已

易矣四時則已變矣其在天地之中者莫不更始焉以是象之也然則何以三年也曰加隆焉爾也焉使倍之故再期也由九月以下何也曰焉使弗及也故三年以爲隆總小功以爲殺期九月以爲間上取象於天下取法於地中取則於人人之所以羣居和壹之理盡矣故三年之喪人道之至文者也夫是之謂至隆是百王之所同古今之所壹也未有知其所由來者也孔子曰子生三年然後免於父母之懷夫三年之喪天下之達喪也

三年之喪至期則小祥男子除絰婦人除帶始食菜

果居聖室。父在爲母。爲人後者爲本生父母之類。皆以期斷也。天地四時卽論語宰我問期已久之意。加隆者服雖親以期除倍而再期。加隆于父母也。焉語辭猶將也使弗及使弗及期也。以爲間期與九月居隆殺之間也。三五九天地人相乘之數。說詳易。故三年爲一閏。三月爲一時。五爲五行。九爲九宮。陽數之極也。羣居謂兆民和者不拂于情。壹者不違于禮。先王所以統人羣使之和順齊一者。仁孝之教行而于喪服盡制矣。順情通理。故曰人道之至文。

三年問終

深衣第三十九

王制云有虞氏深衣而養老。玉藻云朝玄端夕深衣。自天子至庶人通用之服。衣與裳連故曰深衣。又謂之長衣。玉藻謂深衣以帛裏布。非禮。鄭遂謂深衣專用布。純采爲深衣。純布爲麻衣。有表爲中衣。純素爲長衣。鑿說也。其實一深衣耳。布帛皆可爲。有禮服則著于中。無禮服則著于外。純采純素吉凶隨時而已。古者深衣蓋有制度以應規矩繩權衡。短毋見膚。長毋被土。續衽鉤邊。要縫。袪半下。袼各之高下。可以運肘。袂之長短。反詘之。及肘。帶下毋厭髀。上毋厭脅。當無骨者。

制有十二幅以應十有二月袂圓以應規曲袷如矩以應方負繩及踝以應直下齊如權衡以應平故規者行舉手以爲容負繩抱方者以直其政方其義也故易曰坤六二之動直以方也下齊如權衡者以安志而平心也五法已施故聖人服之故規矩取其無私繩取其直權衡取其平故先王貴之故可以爲文可以爲武可以擯相可以治軍旅完且弗費善衣之次也具父母大父母衣純以續具父母衣純以青如孤子衣純以素純袂緣純邊廣各寸半

規矩繩權衡下文所謂五法也母見膚謂長及踝母

被土謂不曳地衽裳幅卽衣襟也。禮服衣裳不相連幅不接續深衣連裳周迴十二幅合縫掩過前襟故曰續衽鉤邊謂幅之連合邊際處皆鉤曲覆縫使密也要縫半下謂要以下全布六幅幅廣二尺二寸斜裁爲二寬頭向下狹頭向上上居三之一下居三之二合之則腰間廣七尺二寸下邊廣一丈四尺四寸故曰半下。袼腋通腋也肘出入處寬可回轉其肘袂袖也長短比肘過一尺反詘之可以掩肘。玉藻云繼掩尺是也。古者衣皆有帶束帶處卑不壓髀高不壓脅腋以下爲脅腰以下向後兩旁大骨爲髀當無骨

謂當腰間肉處也。餘制詳玉藻。天行大數終于十二。故冕十二旒。深衣衽亦十二幅。袖用圓領用方。袷交領也。矩。曲尺領下曲交合。有如矩之象。負繩。謂背後脊縫直下如繩也。蹠。足跟也。下齊如權衡。謂衣下邊前後左右平齊無參差也。袂。所以圓者。欲其行動舉手爲容也。圓主動。手拱成圓。抱方。謂領方交于前如抱。所以負繩者。繩直取其正。政正同。所以抱方者。領方取其義。易坤卦六二。地德正中。直以方。引以贊。直方之義。五法。卽規矩繩權衡。凡貴賤男女吉凶通用。禮服內皆可著。如親迎。女在途。壻父母死。亦深衣縮



總趨喪是婦女亦用也文武擯相軍旅無不可服五  
法備故曰完制簡用儉布帛隨宜故不費此衣之最  
良者亞于正服故曰次父母王父母具存最吉緣以  
綵續父母具存吉緣以青東方生氣之色也三十以  
下無父母曰孤子衣色隨宜緣必以素不忘衰也純  
卽緣也袂緣謂袖口邊謂衣下及側邊緣各寬寸半

深衣終

禮記通解

卷二十

五十四

深衣

友

投壺第四十

投壺與射畧相似皆燕飲樂賓之禮壺本酒器堂室之近不可張侯賓主又不足備官故借酒器以寓射云爾

投壺之禮主人奉矢司射舉中使人執壺主人請曰某有枉矢哨壺請以樂賓賓曰子有旨酒嘉肴某既賜矣又重以樂敢辭主人曰枉矢哨壺不足辭也敢固以請賓曰某既賜矣又重以樂敢固辭主人曰枉矢哨壺不足辭也敢固以請賓曰某固辭不得命敢不敬從賓再拜受主人般盤還旋曰辟避主人阼階上拜送賓般

還曰辟已拜受矢進卽兩楹間退反位揖賓就筵

矢壽也以投壺投壺倣於射故以矢名司射掌其禮  
推賓黨與燕者一人爲之中盛筭器投中者則取筭  
計之故謂中解見鄉射禮枉不直也哨口不正也矢  
貴直而曰枉壺貴正而曰哨謙辭也旣賜猶卒賜般  
還猶盤旋不進之貌曰辟告不敢當也受受矢送送  
矢已拜主人拜畢也受矢主人自受矢與賓爲耦也  
進卽兩楹間主人進兩楹間視投壺之處乃退復昨  
階之位揖賓就楹間之筵筵卽投壺之席賓主各就  
席也

司射進度入壺間以二矢半反位設中東面執八筭興  
請賓曰順投爲入比去投不釋勝飲不勝者正爵既行  
請爲勝者立馬一馬從二馬三馬既立請慶多馬請主  
人亦如之命弦者曰請奏翟首間若一大師曰諾左右  
告矢具請拾投有入者則司射坐而釋一筭爲賓黨於  
右主黨於左卒投司射執筭曰左右卒投請數二筭爲  
純一純以取一筭爲奇遂以奇筭告曰某賢於某若干  
純奇則曰奇鈞則曰左右鈞

司射以壺置兩楹間當賓主筵席中席去壺各二矢  
半司射反西階設中以盛筭也筭計中曰筭東面立

中西也。執八筭立耦四矢則八筭。順投以下八語。司射先以投壺始終之節戒之。順投爲入矢本先入也。未入爲逆雖入不爲入也。比連也以鼓爲節賓主遞投若一人連投雖中不釋筭釋猶放也。謂置筭于地正爵謂投壺三翻當飲之爵。投畢則無筭爵也。立馬謂三翻投畢乃立馬。馬卽筭也。勝負未定記入曰筭。旣勝之筭曰馬以爭先得名也。謂三翻投畢立勝者所得之馬。一翻勝則另植一馬。禮成于三三馬專勝則爲一成。如賓勝二馬主人一馬則取主人一馬以足賓之二馬。主人勝亦然。請慶多馬謂酌酒賀多馬。

之人以上皆司射預告之辭。命弦者。戒弦歌者。射以樂爲節。投壺則鼓瑟弦歌。爲發矢之節。釋首逸詩篇名。間若一。謂緩急作止之間。均停如一大師歌工。主人黨爲之。左右衆耦也。衆賓居西爲右。衆主居東爲左。拾投每耦兩人更迭投。坐跪也。每一矢入。司射跪釋一筭于前。賓黨勝釋于右。主黨勝釋于左。三翻皆然。卒投每。一翻投畢也。左右卒投請數者。司射之告辭。二筭以下。數筭之法。純雙也。奇隻也。每二爲純。零爲奇。筭以雙取。有零則以奇筭之。數畢告左勝。曰左賢于右。右勝。曰右賢于左。賢勝也多。一雙曰賢若干。

然如多十曰五雙多八曰四雙之類有零數曰若干  
奇如多九曰九隻多七曰七隻之類均曰左右鈞不  
復言多寡也

按卒投筭獲左右不分耦通賓主之黨左勝則賓黨  
飲右勝則主黨飲與射禮筭法同餘詳鄉射禮

命酌曰請行觴酌者曰諾當飲者皆跪奉觴曰賜灌勝  
者跪曰敬養正爵既行請立馬馬各直其筭一馬從二  
馬以慶慶禮曰三馬既備請慶多馬賓主皆曰諾正爵  
既行請徹馬

命酌司射命酌酒飲不勝者也酌者勝黨之子弟奠

觴豐上不勝者跪自奉之曰賜灌言已不賢而蒙灌  
罰順受之辭勝者曰尊敬安養勸侑之辭正爵謂不  
勝者當飲之爵請立馬司射請也前卒投請數謂每  
投一翻畢通左右黨筭勝負此立馬謂分計各耦三  
翻勝之多寡也馬各直其筭謂三翻每一筭勝者當  
以一馬一馬從二馬者謂一人二馬一人一馬則取  
其一以從其二成三而慶賀三馬者以酒也正爵謂  
多馬者所當慶之爵請徹馬投壺禮畢也此節之義  
鄭註未達

筭多少視其坐籌室中五扶堂上七扶庭中九扶筭長



尺二寸壺頸脩七寸腹脩五寸口徑二寸半容斗五升  
壺中實小豆焉爲其矢之躍而出也壺去席二矢半矢  
以柘若棘毋去其皮魯令弟子辭曰毋撫呼毋教毋偕  
立毋踰言偕立踰言有常爵薛令弟子辭曰毋撫毋教  
毋偕立毋踰言若是者浮

筭之多少視坐上人數每人四矢卽四筭等卽矢也  
室中堂上庭中皆謂投壺之處燕有大小則地有廣  
狹置壺有遠近則矢有長短扶作膚四指爲膚膚  
四寸五扶二尺七扶二尺八寸九扶三尺六寸矢有  
長短壺去席二矢半各因其矢則是室中壺去席五

尺堂上壺去席七尺庭中壺去席九尺也庭中堂下  
 之中柘棘二木堅重毋去皮全質也令司射令也子  
 弟賓主黨之少者立于堂下戒勿相狎也魯薛二辭  
 所傳各異魯爲周禮薛國任姓黃帝裔孫奚仲事禹  
 受封于薛傳世最遠有古之遺禮近魯而小事魯故  
 錄其令鼓與魯并傳也撫作呼戒號呼也敖傲惰也  
 偕立不正所向也踰言遠譚外事也常爵當罰之爵  
 浮滿酌也

鼓 ○ □ ○ ○ ○ □ □ ○ ○ ○ □ ○ ○ ○ ○ ○ □  
 □ ○ □ ○ ○ 魯鼓 ○ □ ○ ○ ○ □ □ ○ ○ ○ ○ □ □

月三 卷二 三三  
○○□□○半○○○○○○薛鼓取半以下爲  
投壺禮盡用之爲射禮

此射與投壺擊鼓之節圓者擊鼙方者擊鼓

按有圖無辭卽所謂聲也和之以狸首騶虞等歌卽  
所謂辭也亦可以證聲與辭之異矣

司射庭長及冠士立者皆屬賓黨樂人及使者童子皆  
屬主黨

庭長卽司正鄉飲酒禮將旅使相爲司正在庭中立  
于解南北面察飲不如儀者冠士成人來觀禮者樂  
人擊鼓與弦歌者也使者薦羞之使皆得與于投壺

者也

魯鼓 ○ □ ○ ○ □ □ ○ ○ 半 ○ □ ○ ○ ○ ○ □

○ □ ○ 薛鼓 ○ □ ○ ○ ○ ○ □ ○ ○ □ ○ ○ □ ○

□ ○ ○ □ ○ 半 ○ □ ○ ○ ○ ○ ○ ○ □ ○

此與前圖異亦一家之說附錄于此

投壺終

豐邑通解

卷三

六

投壺

儒行第四十一

此篇之言大抵誇誕託稱孔子而孔子之大寔不以  
儒儒儒也史列九流而儒居一得一矢八所收其幾  
卽若所云孔子辭其服甘處其名乎哀公儒孔子戲  
之耳孔子張大其行若爲解嘲然不屑之意在言表  
數千年無人領畧反以儒尸祝仲尼仲尼其享之邪  
魯哀公問於孔子曰夫子之服其儒服與孔子對曰丘  
少居魯衣逢掖之衣長居采冠章甫之冠丘聞之也君  
子之學也博其服也鄉丘不知儒服

逢猶大也掖肘間謂衣掖下寬大所謂侈袂也章甫

冠名郊特牲曰章甫殷道也宋殷後博廣也鄉者不  
拘一方儒服則有方矣故曰不知不屑之辭也

按大道裂而後百家分如王者無外強藩割據偏安  
一隅以爲王室不知九州之本皆吾土也百家與儒  
分曹儒者自錮而小之孔子恥儒服不居其名而亟  
數其物無可無不可聖人所以大也

哀公曰敢問儒行孔子對曰遽數之不能終其物采  
數之乃畱更僕未可終也哀公命席孔子侍曰儒有席上  
之珍以待聘夙夜強學以待問懷忠信以待舉力行以  
待取其自立有如此者儒有衣冠中動作慎其大讓如

慢小讓如僞大則如威小則如愧其難進而易退也粥  
粥若無能也其容貌有如此者儒有居處齊聲平難其  
坐起恭敬言必先信行必中正道塗不爭險易之利冬  
夏不爭陰陽之和愛其死以有待也養其身以有爲也  
其備豫有如此者儒有不寶金玉而忠信以爲寶不祈  
土地立義以爲土地不祈多積多文以爲富難得而易  
祿也易祿而難畜也非時不見不亦難得乎非義不合  
不亦難畜乎先勞而後祿不亦易祿乎其近人有如此  
者儒有委之以貨財淹之以樂去聲好見利不虧其義劫  
之以衆沮之以兵見死不更其守驚蟲攫入聲搏不程

勇者引重鼎不程其力往者不悔來者不豫過言不再流言不極不斷其威不習其謀其特立有如此者

遽急也物猶事也非久留不能盡言其事僕謂侍御賓主相接則有侍御久須更代也席所以藉珍寶陳之席上待價猶儒者陳善道以待召也衣冠中謂中禮大讓如讓國讓天下其迹似倨故曰慢小讓如交際飲食不受其迹似迂故曰僞大如威俯仰無礙也小如愧舉動收斂也粥粥和柔也齊難齋莊畏難也道塗之間不爭平而避險冬夏之間不避熱而就陰不畏寒而就陽淹之以好樂謂以嗜欲漸染之也鷺



蟲攫搏喻凶禍也。不程勇。不程量其勇。言必往也。引重鼎。喻大任也。不程力。言直任也。往者不悔。不追。既往來者不豫。不逆將來。過言不再。失言則必改也。流言不極。流謗終不爲傷也。不斷其威。威不可挫也。不習其謀。不學習而謀也。皆特立之意。

按此節語多疵。君子自立。非有所待。有待卽非自立。居處齊難。坐起恭敬。道途不爭險易。冬夏不爭陰陽。數者無與于豫備。不程勇力。不悔既往。非儒者之高行也。

儒有可親而不可劫也。可近而不可迫也。可殺而不可

辱也。其居處不淫，其飲食不滯，辱其過失可微辨而不可面數也。其剛毅有如此者，儒有忠信以爲甲冑，禮義以爲干櫓，戴仁而行，抱義而處，雖有暴政，不更其所，其自立有如此者，儒有一畝之宮，環堵之室，簞門圭窬，豆蓬戶甕牖，易衣而出，并日而食，上答之不敢以疑，上不答不敢以諂，其仕有如此者，儒有今人與居，古人與稽。今世行之，後世以爲楷，適弗逢世，上弗援，下弗推，讒詔之民有比黨而危之者，身可危也，而志不可奪也。雖危起居竟信，申其志猶將不忘百姓之病也。其憂思有如此者，儒有博學而不窮，篤行而不倦，幽居而不淫，上通

而不困。禮之以和爲貴。忠信之美。優游之法。慕賢而容衆。毀方而瓦合。其寬裕有如此者。

居處不淫。謂不可以燕安溺之。飲食不滯。謂不可以嗜味染之。滯。濕也。忠信則利有攸往。如甲冑可以自衛也。禮義則患難不生。如干櫓可以禦侮也。甲在身。冑在首。干小盾。櫓大盾。暴政不更其所謂。世亂不易其守也。徑一步。長百步。爲一畝。折而方之。東西南北各十步也。宮。謂居宅。五版爲堵。堵方一丈。環堵四面各一堵也。葦門。猶言柴門。編荆竹爲門也。圭形方而上。剡。窬。竇通。穿牆爲竇。如圭形。通出入也。易衣而出。

與家人共衣出則相更易也并日而食兩日得一日之食上答之不敢疑道合則從無疑畏也不合則去無卑屈也幽居不淫窮不失義也上通不困達不離道也禮之以猶言禮之用毀方瓦合如陶者爲瓦初則共圓割則各方以覆屋則相合也

按過失不可面數非士人之虛懷自立與前自立語複毀方瓦合似鄉原非夫子之言

儒有內稱不辟親外舉不辟怨程功積事推賢而進達之不望其報君得其志苟利國家不求富貴其舉賢援能有如此者儒有聞善以相告也見善以相示也爵位

相先也。患難相死也。又相待也。遠相致也。其任舉有如此者。儒有澡身而浴德。陳言而伏靜。而正之上。弗知也。雖而親之。又不急爲也。不臨深而爲高。不加少而爲多。世治不輕。世亂不沮。同弗與。異弗非也。其特立獨行。有如此者。儒有上不臣天子。下不事諸侯。慎靜而尚寬。強毅以與人。博學以知服。近文章。砥厲廉隅。雖分國如鏐。鏐不臣不仕。其規爲有如此者。儒有合志同方。營道同術。并立則樂。相下不厭。又不相見。聞流言不信。其行本方立義。同而進。不同而退。其交友有如此者。溫良者。仁之本也。敬慎者。仁之地也。寬裕者。仁之作也。孫

接有仁之能也。禮節者仁之貌也。言談者仁之文也。歌樂者仁之和也。分散者仁之施也。儒皆兼此而有之。猶且不敢言仁也。其尊讓有如此者。儒有不隕穫於貧賤。不充詘於富貴。不恩聲去。君王不累長上。不閤有司。故曰儒今衆人之命儒也妄。句常以儒相詬病。孔子至舍。哀公館之。聞此言也。言加信行加義。終沒吾世。不敢以儒爲戲。

君得其志。謂使君得遂欲爲之志。任舉。謂任賢舉善。澡浴自新之意。陳言而伏以善言告君。不求自表也。靜而正之。潛銷君心之非也。麤而翹之。顯諫也。翹招。

同舉也不急爲從容不迫也臨深爲高加少爲多皆  
露才揚已之事博學以知多學而識也服近文章威  
儀可觀也砥厲廉隅操行方潔也分國如錙銖所謂  
棄千乘如敝屣也規爲猶言謀爲并立則樂謂名位  
相等不相忌也流言謂風聞之言不信謂相知之深  
本方立義謂制行端正立身合義也同而進達則同  
升不同而退窮則不相累也地猶踐履作謂作用寬  
裕者有作用迫狹者一往竭矣隕失墜也獲拾取也  
克盈滿也詘屈辱也處貧賤失意而思苟取處富貴  
驕蹇而志不立恩猶辱也累猶汙也閔病也不思君

王爲臣不辱君也不累長上爲子弟不累父兄也不  
閔有司爲民不病官府也命儒猶名儒妄謂無實以  
儒相詬病謂儒本巽懦之稱當時以夫子爲東家丘  
故以儒目之詬罵也病賤惡也

按任舉與舉賢援能語複特立獨行與上節獨行語  
複不臣天子不事諸侯非聖人對君之辭強毅非君  
子與人之道仁不本于溫良孫接亦不必仁此二語  
未確大抵此篇之辭多後儒緣飾非盡聖人語也